

ბონდო მაცაბერიძე

ზღაპრები ბექნა ბიჭვინძე

გამომცემლობა "ბაკმი" – 2010 წ.

## ზღაპრები ბექნა ბიჭზე

არც რა იყო არაფრისა, არც რა ჰქონდათ არაფრისი, ამბავ იყო ზღაპრად თქმული, ამ ცისა და ამ ბარისი.

ბექნაზე გითხრობთ:

ბექნა - სახელია, კი. პატარაა ჯერ ბექნა.

აი, იმ - სახვნელის წინ მიძლოლა რომ სძალუძთ,  
- ოდენა.

აქ, საჭურველიც ვნახოთ მისი:

შურდული და მშვილდ-ისრები,

ოროლები, გორდა ხმლები.

თოფები და დამბაჩები -

სულ ხისაგან ნათალები.

მინდორ-ჭალად ჰუნე მარდი,

ოღონდ წნელის, არა ნაღდი.

სწაღდა ბექნას გმირობა, მეტადრე - ბრძოლა დევთან, ანკი გველეშაპთან. ეგ იყო, დევი ვერა ეპოვნა, ვერცა გველეშაპი.

ივლიდა საღამომდის ტყე-ტყე, მშვილდუსხლეტა. აქკი, ჩაჰკითხავდნენ მეზობლები შინ მისულს:

- რაო, ბექნა ბიჭო, დევს ვერსად წაეყარეო?

- ნწუო, - იტყოდა ისიც კურცხალნაყარი და ცხენს ღობის ძირას მიაბამდა.

ახლა, ბექნას დევის მოლოდინში ჩვენც რომ აგრე ტყუილად ვისხდეთ, აქ სათხრობიც ხომ არაფერი იქნება?

მოდით, გავყვეთ ტყეში.

განა ცოტა რამ საგმირო საქმეებია იქა,

თუნდაც, ის რომ:

მიდიან ტყეში - ისა და ცხენი. მიდიან... გაუსწორდნენ ერთ ჩირგვს.

ხმა მოესმათ იქედან ფოთოლთრხევისა.

შედგნენ სმენად.

- არაო, - ბექნამ, - სადამბაჩე აქ რა უნდა იყოსო, - თქვა და ცხენიდან ჩამოხტა.

- რავიო, - ცხენმაც, - რამე კი არ მოიხიფათოო და...

რა იყო და - გნოლი, თავისი სამი ლაპითა.

შეცბნენ გნოლები;

- შეხე, რამოდენა თოფ-იარაღი აუხხამს, სულ ჩვენზე უნდა გახარჯოს?! - თქვეს და მოჰყვნენ ცრემლები პურჭყვას.

- არაო, - ბექნამ, - განა მონადირე ვარ, ეგ თოფ-წამალი თქვენთვის რომ მოვხარჯო, თქვენ ის თქვით, დევი ხომ არ გინახავთ, აქო?

- დევი არა, მელა კი გვსდევს ფერდს გაღმიდანო, - მათაც.

- ჰოო... გამოდით ახლა მანდედან და ამ ჟიჟო ბალახში გაგოგმანდით, მელა თორემ ისიც რაღა?! - უთხრა ბექნამ გნოლებს და გზას გაჰყვა.

მიდიან გზად - ისა და ცხენი. მიდიან...

- აგე, მელიაცო! - შედგა ცხენი ასიოდფლოქვნავალზე.

მართლაც;

ჩამჯდარა მელა ერთ მიწაღრმულში და გაუდგამს მზერა გზაზე.

- არაო, - ბექნამ, ეგ მთლად არ ინდობაო, - თქვა და გაიკრა ხელი იარაღზე, - მანდ რას ზიხარო?! - ჰკითხა.

რას ეტყოდა მელა კარგსა,

იმართლებდა ოხერ თავსა.

ასეც მოხდა, იცრუპირა:

- ამეზნა და ვეძებ გზასა.

- ვთქვათო, - ბექნამ, - გნოლებს რაღას ერჩიო?!  
აქკი, მიხვდა მელა, წაიხდინა თავი ტყუილით, - ისაო, ესაო, აზორძიკა ენა დიდხანს.

ბექნამაც,

- არ გაგივა მელავ ტყუილი:

ისაო და ესაო,

გაეცალე გზიდან გნოლებს

და გამიძებ ტყესაო!

ტყის ხსენებაზე, შეცბა მელა,

- ოლონდ, ტყეში არა, სხვაგან საცა გინდა იქ მიმგზამკვლეო, - შეევედრა ბექნას.

- რათაო, - ბექნამ, - დევს ხომ არ ჰგულობ, იქო?

- დევს არა, დევის ტოლა დათვს, კიო.

- მერე, დათვს აგრე რად უფრთხიო?

- აგე, თოფ-წამალიც ბლომად გაქვს და მშვილდ-ისრებიც, ჰოდა, მასაც ვნახავ, რა ქამანდარიც ბრძანდებიო!

- ვნახოთო, - უთხრა ბექნამ და ტყისკენ წავიდა.

მიდიან გზად - ისა და ცხენი. მიდიან... შევიდნენ ტყეში.

უცებ,

რასა ხედავენ და:

ზის ერთ ხის ძირას დევის ტოლა დათვი და ისეთი ხმით ღმუის, ჩახმახშემართული მონადირეც ძნელად რომ მოსხლეტს ტყვიას და, ბექნას რომელ იარაღის მომარჯვებაზეა საუბარი.

- ნუო, - ცხენმა, - აგრე ახლოს ნუ მივალთ, ნახე რამოდენა ტორები აქვსო!..

- რას მიყურებ, დათვი ვარ, დათვი!.. მოაცილე ეგ თოფ-წამალი მანდედან და აქ მოდიო!

- უთხრა დათვმა ბექნას.

ბექნამ თოფ-იარაღი უნაგირზე დადო და დათვთან მივიდა, - მერეო? - ჰკითხა.

- მერე ის რომ, ქალაქის გზა უნდა მაჩვენო, მესამე დღეა ტყიდან ვერ გამიგნიაო.

- რათაო, - ბექნამ, - ქალაქს რა გინდაო?

- როგორ, შენ არ იყავ ამას წინეებზე ზოოპარკში რომ ბრძანდებოდიო?

- ჰოვო, - ბექნამ, - ზოოპარკში ხშირად კი ვარ, მაგრამ, იქ შენ რომ ვერ გხედავო?

- რომელი შენი ტოლი მე ვარ იქ რომ მხედავდე, ჩემს ბელებთან კარგად კი ერთობი?!

ჰოდა, მოდი აქედან დროზე გავიდეთ, ხომ ხედავ, ღამდება!

- რავი, კი ღამდება, მაგრამ, მე რომ დევს...

- კაი ერთი, დევი არა?! - აბუზღუნდა დათვი...

\*

მიდიან გზად - ისა და ცხენი. მიდიან. უკან კიდევ - დათვი მიჰყვებათ.

- არაო, - ეტყვის ბექნა ცხენს ხშირად, - განა შევშინდი, უდედოდ ბელები ხომ ცოდონი არიანო?..

## მეორე დღის ზღაპარი

დილისპირს გაიყოლეს სოფლის შარა, მიდიან გზად - ბექნა და ცხენი. მიდიან...

ჩაეკითხება ცხენი ბექნას აქა-იქა:

- კაცო, ბექნა, აგრე ადრიანად რომ მივალთ, მძინარს ხომ არ დავეცემით თავსო?

- რათა მძინარსო, - ბექნამ, - დევის ძილი სად გინახავსო?

- არა, დევი არც მძინარე მინახავს და არცა მღვიძარს წავყრილვარ არსადო, - ცხენმა.

ერთია, ალბათ - კი;

ახლა ამათ შიში ალაპარაკებთ, თორემ დევების მადევართ თვალი სულ ხმლის წვერზე რომ უნდა ჰქონდეთ წამომიზნული, თავადაც კარგად იციან,

ანკი,

ჩვენაც რაღა-რა, სწადია კაცს გამირობა და...

მიდიან გზად - ისა და ცხენი. მიდიან...

აგე;

ტყვეც გაიშუაგულეს რომ წინ, სოფლის მონადირე - მერაბა შემოხვდათ.

მოენადირა მას ჯიხვ-არჩვი, ხომ უთვალაობით, ძლივასძალით მოეკიდა კიდეც მხარზე.

შეხედა მერაბა მონადირემ ბექნას და ჰკითხა:

- რაო, ბექნა ბიჭო, ისევ დევს ხომ არ ეძებო?

- ჰოვო, - მანაც.

- მერე, დევებს დღეს რომ უქმე აქვთ, როგორ იპოვით?

- რავი, აბა?.. რაილა აქა ვარ, ბარემ ამ ტყეს ბოლომდე გავედევნებო.

- არა, კაცო, დღეს სულ ტყუილად მოაცდენ, დევებზე - სხვა დროს, აბა, ერთი ეგ შენი ცხენი აქეთ მოდგი და ნანადირევი სოფლამდე დამიმხარეო, - მერაბა მონადირემ ნანადირევი ცხენს გადაჰკიდა და სოფლის გზას დაჰყენენ.

მიდიან გზად - ბექნა და ცხენი. მიდიან.

წინ კიდეც - მერაბა მონადირე მიუძღვით.

- რა იციან, კაცო, ამ მონადირეებმაო, - ეტყვის ბექნა ცხენს ხშირ-ხშირად, - ნადირის დათოფვა უყვართ, მისი ზიდვა კი - არაო...

## მესამე დღის ზღაპარი

ამბავი ვთქვათ, ჩვენაც ბექნას,

ამ ჯერზედაც - ახალ დღისა:

გადიმხარა მშვილდ-ისრები,

ხმაღნაღესი - პირსა მზისა,

ეგ იყო;

იშორეს სავალი, თანკი გაერიდნენ მზის ხვატს. მოკლე გზით ჩაჰყვნენ, ასე - საყანურით,

აქვი -

ემართა მეგუთნეთ ერქვანი,

მიწა ჩაჰნატრებდა მარცვალს - ხორბალისას...

იუარებს ცხენი გზას:

- ხომ ვთქვი, ასე ნუ წავალთ, ეგენი სულ წყალს გაიძახიან-თქო!

აგე;

- ბექნა!

-ჰეი, ბექნა!

- ბექნა ბიჭს გაუმარჯოს, ბექნასო!

- აბა, კაცებო, თქვით, ვინ მოიტანს წყალსო?!
- ბექნა,
- ბექნა ბიჭო, - მიმოსძახეს მეგუთნებმა აქეთ-იქედან.
- აჰაო?! - ცხენმაც.
- კიო, - ბექნამ, - წყალს როგორ არ მივუტან გუთნისდედასო, მაგრამ, - ეტყვის ნაშუადღევს ცხენს დუდღუნით, - ამოდენა კაცებს, ამ პატარა ხელადით როდის დავაწყლულეთო?
- აბაო?! - ცხენმაც.
- არა, სადამოს ხარებიც ხომ უნდა ჩავდენოთ მდინარეზეო? - ბექნამ.
- ჰოვო, - ცხენმა, - აბა ისე, როგორ იქნებო?!.

## მეოთხე დღის ზღაპარი

ის იყო ბექნამ მშვილდ-ისრები მოიმარჯვა და ცხენიც გამოალობისძირა, რომ ალაგედან მეზობლის ბიჭმა - ზურაბამ გადმოსძახა:

- ბექნა, ბიჭო ბექნაო!
  - ჰოვო, - მისძახა მანაც და ალაგესთან მიირბინა.
- ზურაბა ბექნაზე კარგა ბევრად გაიწლოვანებდა,  
 აი, იმ - დევებზე ნადირობა სასაცილოდ რომ არც ჰყოფნით,  
 - ოდენობით.
- კაცო, ბექნა, ეგ ცხენი რად აგიკაზმავსო?
  - დევთან საბრძოლველადო!
  - რას ამბობო?! -
  - ჰო, აგრეაო!
  - კი, დევთან ბრძოლა, კარგია, მაგრამ... მოდი, გზად ეს საფქვავე წამიწისქვილეო, - უთხრა ზურაბამ
- ბექნას და ცხენს სიმინდის მარცვლიანი ტომარა გადაჰკიდა.
- კარგიო, - უთხრა ბექნამ და გზას გაჰყვა...
  - ბექნა!.. ჰეი!.. კაცო!.. ამბობენ, წისქვილს ხშირად ერთი ბობორიყა დევი სტუმრობსო და... რავი რა, ფრთხილად კი იყავიო! - მიაძახა ზურაბა მონადირემ ბექნას...

მიდიან გზად - ისა და ცხენი. მიდიან...

აგე;

მიადგნენ კიდეც წისქვილს;

მერე,

ის რომ;

რაც კი ბედელ-ნალია გამოემარცვლა სოფლის მოხუცებულთ, სულ სავსე ტომრებად ჩაედგათ

წისქვილის კარზე.

აქვი, ცხენმა;

- ეგ, ამოდენა ტომრებს როდის გამოფქვავსო, - თქვა და მარცვლიან ტომრებს ტომარა მიადგა.

გსმენიათ - კი, უთქვამს წისქილს:

«ვინაც, რა უნდა ისა თქვასაო, ჩემმა დოლაბმა, უნდა ფქვასაო...»

- არა, უნდა დაგვეტოვა ეგ რაღაც ტომარააო! - ეტყვის ცხენი ბექნას სადამოხანს, ბრაზით.

- ჰოვო, - ბექნამაც, - მაგრამ... აკი ზურაბამ, წისქვილს ერთი დევი სტუმრობსო და, მისი ტომარაც თან რომ წაეღო, მერე?

- რას ამბობ, ორივეს ხომ მწარედ მიგვტყეპავდაო, - ცხენმა...

## მეხუთე დღის ზღაპარი

ინათა. მართალია, მზე ჯერ კიდევ მთის ფერდობებით ეშვებოდა ბარისკენ, მაგრამ სოფლის კაცებისთვის, მით უფრო - მონადირეებისთვის, დიდი ხნის გათენებული იყო.

ბექნასაც ეღვიძა, კი. ეგ იყო; ლოგინიდან წამოდგომას იქამდე არ ჰპირობდა, ვინემ, სოფლის თემში უთენია გამოსული კაცები ქვეყნის აწეწილ საქმეებს, თავ-თავიანთ გონზე არ მოაწყობდნენ.

ჩაჰკითხავდნენ ბექნასაც ერთპირ, თავად ნახეთ;

რამდენისა რამ კითხვა:

სოფლის მენახირეებისა თუ მთიბველებისა, მეწისქვილე ლასიკოსა თუ გერასიმე

ფოსტალიონისა,

ანკი, მერაბა მონადირეც:

- ბექნა, კაცო, კვლავ დევებზე სანადიროდო?!

ახლა ამათ, ერთი ჩიტბარტყას წიაპიცა, რო:

- წკრუუ-წიაპ, წკრუუ-წიაპ, წიაპ, - წიაპებდა ჩიტბარტყა ბექნას ფანჯრის რაფაზე.

- ჰო, ვიცი გათენდა! - გასძახა ბექნამ ჩიტბარტყას ბრაზიანი ხმით და საბანში კიდევ უფრო ღრმად ჩაჰყო თავი.

არა, ბექნას სულაც არ უნდოდა ბრაზით რომ ეთქვა ჩიტბარტყასთვის. უბრალოდ - ასე გამოუვიდა. მან კარგად იცოდა ჩიტბარტყებს ერთი წაცრემლება გული რომ აქვთ. ეგაა; ახლა არ უნდოდა ჩიტბარტყასთან ხის ტოტებსა და ბუჩქებში თამაში. კი, სურვილი ერთია, მაგრამ, სირცხვილიც როა?! აგერ მეხუთე დღეა, რაცა კაცი აბჯარასხმული დადის დევის საძებრად და მასთან საბრძოლველად და რას იტყვიან, ბარტყით ხელში რომ წასთვალონ სოფლის კაცებმა, ანკი - ზურაბა მეზობელმა, ხორბლით სავსე ტომრით რომ გაგზავნა წისქვილს ბექნა ბიჭი. ბექნამაც ხომ სიმღერით ჩაიარა საყანურზე:

საყანურო მიწაო,

ხარ-გუთანო - ხვნისაო,  
მარცვალს ჩაამიწგუთანებ,  
ყანას წაჰფენ, მზისაო.  
ჩაპურდება, იმუხლმძლავრებს,  
მოზიბინე ზღვისაო.  
შემოდგომით ინამგალებს;  
ბექნა, ტატო, მზისაო.

თუმცა,

ეგ ხომ გუშინ იყო, მეც რაღა-რაღა ახლა გავილექსე? სწუხს სატკივარს რამეს, ჩიტბარტყა, თორემ აგრე დილით, რად იწიაპებდა, რო?

- რა მკითხაობის დროა?! აგე, ფრთა რა დღეში მაქვსო! - ამოყელცრემლა ჩიტბარტყამ და ფრთაზე, ჩანდა ნატკენზე, დაიხედა.

- აბა, მაჩვენეო, - ბექნამ.

- ეგ, სულ შენი მეგობარ ტატოს ნახელავია! აუვსია ჯიბეები იმოდენა ქვებით და აშურდულებს აღმა-დაღმა, - თქვა ჩიტბარტყამ.

- კი, ის იქნებოდაო, - ცხენმაც, - სამი-ოთხჯერ მეც ისე მწარედ მიმათუთქვა ფლოქვებში, როო?!

- ჰო, კარგი, კარგიო, - ბექნამ, - მოდი, ჩიტბარტყას ვუწამლოთ, აბა ერთი

ეგ ხურჯინი მომაწოდეო, - უთხრა ცხენს.

- როგორ, აქ ხომ სულ ტყვია-წამალიაო, - გაიკვირვა ცხენმა და ბექნას ხურჯინი მიაწოდა.

როგორ და;

აბა, ის მონადირე რა მონადირეა, ხურჯინში ტყვია-წამალთან ერთად, დაჭრილის მალამოც თუ არ უდევს?!

ხომ კარგი ვქენით, ჩიტბარტყა რომ არ მოვატოვეთო, - ეტყვის ცხენი ბექნას საღამოხანს, ხშირ-ხშირად.

- ჰოვო, - ბექნამაც, - ტატოს ამბავი ხომ იცი, ხის ტოტებზე არ ასვენებს ჩიტებს და აქ, რა დღეს დააწევდაო?!

## მეექვსე დღის ზღაპარი

დილით, მზეს პირი არ უჩანდა.

არცა ღრუბლიანი ეთქმოდა სულ.

ცა, უმზეობდა.



ასეთზე ითქმოდა;

მზე მთის გადაღმა ჩარჩა წუხელო.

აქვი:

სათიბს იჩქარებდნენ - მთიბველები,

მებადურები - შლიდნენ დგელამურს,

მონადირეებს თოფ-საჭურველი აესხათ და შეცისკრებას ასდგომოდნენ მთას.

ქარს კიდევ რა?!

- სოფლის ამბავი დაჰქონდა გზად.

ამბავი კი ასე იყო:

როცა მგლებმა სოფლის კაცები მინდვრად გაიგულეს, სულ წყვილ-წყვილად იწყეს ტყიდან გამოსვლა, ყანის ბოლოს პალოზე გამობმული თხების საკბილწილოდ.

რომ იტყვიან, მადა ჭამაშიაო და მათაც თხა, პალოზე არ დატოვეს.

წუხდა სოფელი,

აქეთ ეცნენ, იქეთ ეცნენ...

- ვინა, ვინაო და - ბექნაო!

- ბექნა ბიჭი გვიშველის, მაგის თოფ-იარაღს ვენაცვალეთო, - თქვეს სოფლის ქალებმა და ბექნას მიადგნენ:

- ბექნა, შვილო, სულ გარე-გარე რომ დადიხარ, შენს გაზრდას, ერთი ეგ შენი თოფ-წამალი აქეთ მომართე, ასე და ასეა სოფლის საქმეო.

ბექნამაც,

- რაილა დევი ვერა, მგლები მაინც გავსთოფოთო, - უთხრა ცხენს და ტყის პირას მზირად ჩასხდნენ.

სმენოდათ მგლებს ბექნაზე;

- მაგასო, - უთქვამთ, - სულ დევებისკენ აქვს მიმიზნული თავისი თოფ-იარაღი და ჩვენ რაღას გვიზამსო, წამო თუ ძმა ხარ, თხები სხვა სოფლებშიც ხომ ბლომად არიანო, - ამდგარან მგლები და სამუდამოდ გასცლიან იქაურობას.

- კაცო, ბექნა, დროა შინისკენ წავიყაროთო, - უთხრა ცხენმა ბექნას ბინდისპირზე.

- აბა?! დღე როგორ ტყუილად მივასაღამოვეთო, - ბექნამაც.

- რათა ტყუილად? ძილის წინ კაკალოს თბილ რძეს კარგად კი სვლიპავო?

- ჰოვო, - ბექნამ, - მართლაც რა გემრიელი რძე აქვსო?! - თქვა და ნაბიჯს აუჩქარა...

## მეშვიდე დღის ზღაპარი

დილით, ნაწვიმარი დახვდათ.

გაცისკრებას წაეჟინჟლლა, ჩანდა.

თანკი;

ბუგრი გასდებოდა ტყისპირს,  
მიწას ურმებისა ეთქმოდა ნამუხლარი,  
- აველო ხის მჭრელთ.

აქვი, -  
(არშვის გამოჰკრავს წალდი,  
ბუხარს ზამთარის არა აქვს დარდი).  
- კვირადლობდნენ,  
ზედაც რო - წვიმადლისას?!

ეგ იყო;  
ბექნა იჩქარებდა სავალს. იარაღიც აისხა, რომ წნულლობიდან მეზობლის ქალმა, ნათლო  
ბიცოლამ გადმოსძახა:

- ბექნა, შვილო, ბექნაო!  
- დიახო, - ბექნამ, - გისმენთ, ნათლო ბიცოლაო!  
- შვილო, ბექნა, აგრე ადრიანად სად მიხვალო?  
- ნუო, - ცხენმა, - ნუ ვეტყვით, ტყეშიო, თორემ, დღეს, მისი თხის მწყემსვა არ აგვცდებაო!  
- რათაო? - ბექნამ, - ბუგრიანში მგლები ტყიდან სულ სოფელ-სოფელ გამორბიან და  
ნათლო ბიცოლას თხაც რომ წაჰკვილონ, მერე მის ბაღლებს რა ეშველებათო?!  
- კი აბა, თუ კარგია თავად მოუდგნენ თავიანთ თხასო! - ცხენმა.

- არა, ჩვენაც რაღა წვიმიანში გავიმწყემსეთ ნათლო ბიცოლას თხაო?! - წაიბრაზებს ცხენი  
სალამოსპირს შინაგზაზე, - რა, თავად ვერ მოაბალახებდა ყანისპირზეო?!

- კაკალო!  
- კაკალო მოდის! - ყიჟინით გადმოვევლენ წნულლობეს ნათლო ბიცოლას ბაღლები.

კაკალომაც:

- ნახეთ, რამოდენა რძე მოგიტანეთო, - უთხრა ბაღლებს და ბაგის კარი  
ამპიწად შეაღო.  
- აგეო?! - უთხრა ბექნამ ცხენს და ნათლო ბიცოლას ბაღლებს გახედა...

## მერვე დღის ზღაპარი

ღამით მთები დაეთოვა.

თანკი, იმოდენობით;

სოფელს დასცემოდა ნადირი საკბილპიროდ.

- ეგრე, ხომ?!

ბგერებს ისხლეტდა თოფები საყირიმო...

დილისპირს, აქაც ეთოვა,

ჩამოცლილიყო ცა ფანტელებად და მიწას თეთრი ეფინა დილა, - ხარობდნენ ბავშვნი.

მთლად ნახშირისა ჩაედგათ ცხვირი თოვლისპაპისთვის, თან რო მეეზოვედ განემწყესათ?!

გარს უვლიდნენ, ხტუნაობდნენ, ციგაობდნენ, გუნდაობდნენ, იმასა თუ ამასაო?

- თოვლის გუნდა, ლაჩარსაო!..
- ბექნა?
- ბექნა სად არისო? - მიმოჰკითხეს ბავშვებმა ერთი-ერთმანეთს.
- ბექნა კი, მიდის გზად. განა მარტო, ისა და ცხენი. მიდიან...
- მერაბა მონადირე შემოხვდათ წინ,
- საით, ბექნა ბიჭო, - დაეკითხა და მზერით თოფ-წამალი მოუსინჯა, - ისევ ტყისკენო?
- ჰოვო, - მანაც.
- ჰო, კი არა?! ვერ ხედავ, რამოდენა ფიფქებს ყრის!
- კი, ვხედავო, - ბექნამ.
- ჰოდა, რაკი ხედავ, ტყეში - არა!.. აგე, ის შენი დევები სულ ჭალის პირებში დაშლივინობენო, - უთხრა მერაბა მონადირემ და ტყის ბილიკს აჰყვა.
- კაცო, ბექნა, მართლაც რამოდენა ფიფქები ცვივა, არა? - უთხრა ცხენმა ბექნას, - მოდი, შინ დავბრუნდეთ.
- კარგი, დავბრუნდეთო, - თქვა ბექნამ და შინისგზას გაჰყვნენ.

- რა იციან ამ მონადირეებმაო, - ეტყვის ცხენი ბექნას შინაგზაზე, - თოფის ლულა სულ ტყუილებით აქვთ გამოტენილი, რა, თავად ვერ გასთოფავდა დევს ჭალისპირებში რომ წაჰყროდა!

- რავი, აბაო? - ბექნამ...

## მეცხრე დღის ზღაპარი

ღამით, თოვა ჩამდგარიყო სოფლად.

რომ იტყვიან;

ცამ მოიხსნა საკიდარი,

თოვლის ფანტელს ბერტყავს ქარი,

- კი, ასე იყო:

იმოდენა დაეთოვა, იმოდენა, შიშით ნადირიც ვერ ჰპირობდა ტყიდან თავის გამოყოფას.

არცა რამ ნაკვალევი აჩნდა სოფლის გამავალ გზას,

- მონადირეებს დაედგათ თოფი.

შუადღისას, როცა აქა-იქა ცა გამოიმზევებდა, ბავშვები თვალისწამში მოასხდებოდნენ თავ-თავიანთ ციგებს და სიცილ-კისკისით ჩაივლიდნენ სოფლის დათოვლილ ფერდობებს...

მერე, როდის, როდის ამოლევდნენ შინისგზებს. ციგებს თოვლის პაპას მიანდობდნენ და გვიანხანამდე, - ვინემ მთვარე გადასცრიდა ცაზე, ბუხრისპირას  
ზამთრის ზღაპრებს თხზავდნენ:

# ტატოს ზღაპარი

იყო ერთი ტატო-ბიჭი. ჩვენი ტატოსი არ იყოს, მასაც ვეებერთელა შურდული ჰქონდა და ისიც სულ ჩიტბარტყებს დასდევდა ეზო-ეზო იმ თავისი შურდულით.

სადაც კი ჩიტბარტყას წასთვალავდა, ადგებოდა, მოსხლეტდა იმ თავის შურდულს და-ტკლავ! ისე მწარედ მიათუთქვავდა ჩიტბარტყას ფრთებზე, რომ;

ატებდა ჩიტბარტყა ჭყივ-ჭყივსა და ერთ ცრემლებს პურჭყვას:

- დედა, დედა, ნახე, ტატომ რა მიქნაო!

შვილის ჭყივილზე მოფრინდებოდა დედა ჩიტი, შვილს ნისკარტს გამოსდებდა და ბუდე-ბარტყიანად გასცილდებოდა ტატო-ბიჭის ეზო-კარს.

ახლა სხვა ხეს მიათვალყურებდა ტატო-ბიჭი, იქაც ისევ მიუშვებდა ქვას,

*ასე იყო მრავალდღისად,*

*მერე - სხვას და მერე - სხვას...*

აქკი, ვეღარ გაუძლეს ჩიტებმა ტატო-ბიჭის ქვების ამდენ ჭახაჭუხს და მერაბა მონადირეს მიაძღურვეს კარზე:

-კაცო, მერაბ, აგრე შვრება და აეგეთ დღეში ვაართო, - უთხრეს,

-თუკი ამისთანა ქამანდარი ვინმე კია ეგ თქვენი ტატო - ბიჭი, მიდი, ტყეში წაიყვანე, დათვი მოინადიროსო.

- რას ამბობთ, ტყეში ბაღლს რა უნდა, - უთხრა მერაბა მონადირემ ჩიტებს,- ისიც ხომ თქვენი კბილაა, ჰოდა, თავად გამოსწყვიტო.

დაიმწუხრეს ჩიტებმა. ჩსხდნენ თავ-თავიანთ ბუდეებში და კარგახნობა ფრთაც არ აუცისწვევითეზიბათ ბუდეებიდან.

- აგე, ეგეც შენი ტატო-ბიჭიო! - უთხრა ბუხარმა ტატოს, - შენც ხომ მაგრე დაგაქვს ეგ შენი შურდული ეზო-ეზო, ადე, მოიტა აქ!

ტატო-ბიჭზე გამწყრალმა ჩვენმა ტატომ, უბიდან შურდული ამოიღო და ბუხარში უხმოდ მოისროლა.

დარჩა ჩვენი ტატო უშურდულოთ.

ზღაპრის ტატო-ბიჭისა კი, რა გითხრათ, დაველოდოთ ჩვენაც ბუხრის ხვალის ზღაპარს.

# მარიამის ზღაპარი

იყო გოგო მარიამი. პატარაა ჯერ მარიამი. თუმცა, მას სულაც არ ჰგონია თავისი თავი პატარა. ანკი, რატომ უნდა ეგონოს, მერე რა რომ გულზე სატყუარა წოწნობილა ჰკიდა. აბა ნახეთ, თოჯინებს როგორ უვლის;

მთელი დღეები ხომ გვერდიდან არ სცილდება და არ სცილდება, გვიანხანამდე, ვინემ მთვარე თოჯინებს ილს არ გამოსტყუებს, აკვანთან უზის იმ თავისი სატყუარათი.

ვნახოთ; ერთ დღეს, მარიამს მამა ტყიდან პატარა დათვის ბელი მოუყვანა.

გახარებულმა მარიამმა ბელს შესაფერი კაბა შეურჩია, ფეხზე ნათლო ბიცოლას ნაქსოვი წინდა წამოაცვა და თოჯინებს გვერდით მიუსვა.

- კაი, ერთი?! - თქვა ბელმა და თოჯინები სულ ბარტყა-ბურტყით მოისროლა აქეთ-იქით.

ინაწყენეს თოჯინებმა, შეჰკრეს პირი და გაბუსხულები მიმოსხდნენ საწოლზე.

- აბა, იცოდე ჭკვიანად მოიქეცი! - უთხრა მარიამმა ბელს და გულზე სატყუარა წოწნობილა ჩამოჰკიდა.

ატრიალა ბელმა წოწნობილა კარგახნობა, ატრიალა. მაგრამ რა; თამაში ერთია, მუცლის გამოტისნა - მეორეო, თქვა და ოთახში მოისროლა.

- რად ისროლე?! ახლავე ადექი და მოიტანე! - გაუწყრა მარიამი ბელს და ისე მოჰქიჯნა თმაში ერთი-ორჯერ, რომ...

- რათა მცემ, თუ კარგია სატყუარა შენ გქონდეს, - თქვა ბელმა, - მე კი, ის რძიანი ბოთლი მინდა, მანდ რომ დევს, თორემ, ავდგები და წავალ ტყეში!

გამოართვა ბელმა მარიამს რძიანი ბოთლი, ჩამოსრუტა ბოლო წვეთამდე. მერე, გადაკოტრიალდა-გადმოკოტრიალდა და ადუდლუნდა:

- შაქარყინული მინდა, აგე, იქ რომ დევს, თუ არ მაჭმევ, ავდგები და წავალ ტყეში!

გამოართვა ბელმა მარიამს შაქარყინული სავსე ჯამთასი, აკნაწუნა შაქარყინული, აკნაწუნა. მერე, გადაკოტრიალდა-გადმოკოტრიალდა და ადუდლუნდა:

- - ერბო მინდა, აგე, იქ რომ დევს, თუ არ მაჭმევ, ავდგები და წავალ ტყეში!

გამოარო მარიამმა თახთახარი, გადმოიღო ერბოთი სავსე ხალანი და ბელს წინ დაუდგა.

სწვდა ბელი ერბოიან ხალანს, სვლიპა ერბო, სვლიპა, მერე გადაკოტრიალდა-გადმოკოტრიალდა და ადუდლუნდა:

- თაფლი მინდა, თუ არ მაჭმევ, ავდგები და წავალ ტყეში!

გავიდა მარიამი კარში მაგრამ სადაა, რო?!

*არცა დახვდა არაფრისა,*

*-არცა თაფლი, არცა ფიჭა-ო,*

*- უთხრა ბელს.*

მაშინ, ადგა ბელი, დაჰკრა ფეხი და წავიდა ტყეში.

გაეცრემლა...

კი, დაბრუნდებაო, ეტყოდა მარიამი თოჯინებს და გზაზე მზირად იდგა, მრავალდღისად.

ბექნამაც:

- რავიო, სამტროდ არ წამსთვალოსო და, - იარაღაყრილი დაეძებდა ბელს, ტყე-ტყე...

გადიმარტა.

თოვლნაფიფქარ მიწას იისფერი წაჰფენოდა აქა-იქა.

ის იყო გოგო-მარიამი იების საკრეფად ეზოში გავიდა, რომ პეპელა-პეპლათარმა იების დიდი თაიგული გადასცა.

ყვავილების თაიგულს მეგობრების ბარათიც ხომ ახლავს ხოლმე თან, ჰოდა, აქაც:

*გოგო მარიამო!*

*იცი, ჩვენთან რამდენი ყვავილება?!*

*კიდო, ბევრი, ბევრი თაფლი შევაგროვეთ მე და ფუნთომ. ფუნთომ თქვა, გოგო-მარიამს შევუნახოთო.*

*როგორი ცუდი კაცია ის თქვენი მერაბა მონადირე, არა? სამჯერ მომიმიზნა ის თავისი თოფი, ძლივს გავასქარი, გოგო!*

*არა, გული კი არ მომდის. მონადირის საქმე ეგააო, მითხრა დედამ, შენ უნდა იყო ფხიზლად და შინიდან ფეხი არ უნდა გაადგაო, თორემ ერთხელაც იქნება, სადმე გაგსთოფავსო.*

*მალე, ჩვენთან პეპლები ამოვლენ ბარიდან და შენც რომ მოხვალ ბევრი ყვავილები დაგკრიფოთ, კარგი?*

*მალე მოდი, ხო.*

*აქ ჩემი მისამართია, აი ნახე:*

*თხილნარის ტყეს რომ ამოივლი, მერე...*

*- არა, მისამართი არ გჭირდება! - უთხრა ბუხარმა მარიამ გოგოს, - რავიცი, დაჰკრა ფეხი და შენაც ტყეში წახვიდე, მერე, ამოდენა თოვლში სად გეძებო?..*

*აპრილის ბოლოს, კი ბატონო, საცა გენებოს...*

## ბექნას ზღაპარი

ხომ ეგრე ვთქვით, წინათ;

ცამ მოიხსნა საკიდარი, თოვლის ფანტელს ბერტყავს ქარით, ჰოდა, თოვს მას აქეთ...

იმოდენა დაეთოვა, იმოდენა, არცა ნაკვალევი აჩნდა სოფლის გამავალ გზას და, არცა რამ ამბავი ითქმოდა ტყიდან, ცხოველთა...

ყანწებსა თუ სამწდეურებში ჩამწყდარ მონადირეთ ერთი ტყვიის სხლეტა აეტეხათ მთის წვერზე გადმომდგარ მთვარისთვის იმ თავიანთი ყირიმის თოფებით.

თქვეს აკი თოფთა:

-ვინემ ტყვია გაიკბილავს ნადირს,  
მეპატრონე ჩვენი - სტუმრობს მთვარის ნადიმსო...

ამოდენა თოვლსა და ყინვაზე გამწყრალი ჩვენი ბექნაც მიუჯდა იმ თავისი გვარის ბუხარს  
და აყრევინა და აყრევინა ზამთრის ზღაპრები:

ბუხარმა ჯერ, კურდღლის ზღაპარი მოუამბნა, აი იმ კურდღლისა, სტაფილო რომ  
ჰყვარებია ძალიან, და ერთ დღეს, ნათლო ბიცოლას ბოსტანში რომ შეპარულა. მიმდგარა  
ბოსტანს და იმდენი სტაფილო უჭამია და იმდენი სტაფილო უჭამია და ისე გაუტისნავს  
მუცელი, ნუ გავთქვამთ და, მუცლის გვრემაც კი დაჰმართნია. წასდგომია ნათლო ბიცოლა  
თავზე. გასწყრომია კია ცოტათი. მერე, შესცოდებია აეგეთ ყოფისთვის;

- არა, ბექნას რომ დაენახე, რას ფიქრობდიო, - უთქვამს, - ხომ გაგისაფანტებდა მაგ  
ყურებსო!

ბექნას სახელის გაგონებაზე მოუღია კურდღელს პირი და უყრია და უყრია ცრემლები  
იმოდენობით, რომ...

- კი, აბა?! არც არაფერსო! - მისძახა ბექნამ ბუხარს ბრაზით და მინავლულ ცეცხლს შემა  
დააყარა.

- ძალიან კარგიო, - კვერი დაუკრა ბუხარმა ბექნას და იმ ციყვის ზღაპარი უამბნა,  
წისქვილის ახლოს, კაკლის ხის ფულუროში რომ სახლობდა:

ერთ დღეს, შინ გვიან მიბრუნებულ ციყვს ფულუროში, ბუკნაჰო არ დახვედრია?!

გადმოუკარკლავს თვალები იმ მარტლა ბუს, იმას, და;

- არაო, - უთქვამს ციყვისთვის, - აქედან ფეხს არ გავადგამ, შენ, საცა გინდა იქ იცხოვრეო.

- - რათა, ეს ხომ ჩემი სახლიაო? - წაეცრემლა ციყვი ბუკნაჰოს...

.....

ზღაპრის ბოლო ხომ კეთილია, ჰოდა, ჩვენაც ბოლოსა ვთქვათ:

როცა ბუკნაჰო ციყვის ფულუროში ბარტყად იჯდა, ციყვიც იქვე, კაკლის ძირას მდგარა  
მზირად.

- დიახაცო, ჩვილ ბარტყებს ხელის შეწევნა რომ დასჭირდეთო?!

- უთქვამს...

- ესეც ციყვის ზღაპარიო, - თქვა ბუხარმა და მამლის ზღაპარი უამბნა ბექნას, ასე:

იყო ერთი მამალი. მეტად ამპიწი ვინმე კი ყოფილა ეს ჩვენი მამალი! ისე მჭახედ  
დაიყვივლებდა ეზო-ეზო, შიშით, ერთ მითქმა-მოთქმას მიეცემოდნენ დედლები:

- აი, ყიყლიყო და ხმის ჩავარდნა, შენო!

ერთხელაც ადგა ეს ჩვენი მამალი და...

- არა, არ მინდა მამლის ზღაპარი, - უთხრა ბექნამ ბუხარს, - მონადირე ბიჭის ზღაპარი  
მიამბეო!

- მონადირე ბიჭზე, ბექნა ბიჭის ზღაპარი ვიცეო, - თქვა ბუხარმა, და უამბნა მანაც:

იყო ერთი ბიჭი. ბიჭს ბექნა ერქვა და ნადირობა უყვარდა ძალიანო. მეტად მომართული  
თოფ-იარაღი ჰქონდა ბექნა ბიჭს, აგე, შენ რომ გაქვს, მაგეთიო. ერთ დღეს, ადგა ბექნა  
ბიჭი, აისახა ის თავისი თოფ-იარაღი და ტყეში სანადიროდ წავიდა...

- მარტოკა?

- რათა მარტო, ცხენიც ჰყავს ბექნა ბიჭს.

- მერე?

- იარა ბექნა ბიჭმა იმ თავისი ცხენით, იარა, ცოტა თუ ბევრი, წინ...

- დევი შემოხვდა?!

- როგორი სულსწრაფები ხართ ეს ბალები? დევები რომ სოფლის განაპირას სახლობდნენ, ტყეში სანადიროდ ვილა წავიდოდა? - უთხრა ბუხარმა და განაგრძო: იარეს, იარეს და გნოლები შემოხვდათ ქინ. არაო, ამათზე ტყვია-წამლს ხომ არ მოვხარჯავთო, უთქვამთ და გასდგომიან გზას.

იარეს, იარეს - ცოტა თუ ბევრი, მელა გადაჰყრიათ წინ.

- შენაო, - უთქვამთ მელიათვის, - თვალთმაქცობას მოეშვი, თორემ გნოლებმა კიდევ თუ რამ სამდურავი თქვეს შენზე, იცოდე, მაგ კუდს ზედ ძირში მიგასვლიპავთო!

ამდგარან ბექნა და ცხენი და გაჰყოლიან გზას.

იარეს, იარეს - ცოტა თუ ბევრი, გზად, ჩიტების გუნდს წაჰყრიან.

მონადირის დანახვაზე აუტეხავთ ჩიტებს ერთი წიაპ-წიაპი;

- გვიშველე, მაგ შენი თოფ-იარაღის ძალამ, ტყეში აღარ გვედგომება, დაუკრავს ფეხი იმ ოხერ დათვს, იმას, და დაშლიგინობს ქლმქ-დაღმაო...

აქ ბუხრის ზღაპრის მოსმენას ცოტა ხნით მოვეშვით და ჩვენს ბექნას მივხედოთ, რადგან დევის ხსენებაზე ბექნას შინ გული რომ არ დაუდგება, ყველამ ხომ კარგად ვიცით.

აგე, ჩამოხსნა კიდევ თავისი თოფ-იარაღი, რომ ეზოდან დევის ხმა მოესმა:

-ბექნა, ჰეი, ბექნა!

ბექნამ თოფის სასხლეტი მოსწია, თოფი მოიმარჯვა და კარში გავიდა.

- თოფი რად გინდა, განა ჩემი ფეხით იმსთვის მოველ, რომ გამსთოფო? აგე, შვილი მოგიყვანე, ჩემი დევიკუნა, - უთხრა დევმა ბექნას, - შინ არ ჩერდება, სულ გარე-გარე დადის, რა ვქნა, მერაბა მონადირეს არ წაეყაროს სადმე, ხომ იცი მისი ამბავი...

ამ ზამთარს შენთან დაიყენე, იქნებ, შენ მაინც შეასმინო რამე. აპრილის ბოლოს ამომიყვანე მთაში, ეგ თოფ-წწამალიც თან წამოიღე, ისეთ არჩევებზე განადირო, როო?! - უთხრა დევმა ბექნას და ტყეში წავიდა...

ბუხრის ნაამბობსსა ვწერ:

- რა ვქნაო, - ბუხარმა, - ბექნას და მის დევიკუნას ის თავიანთი თოფ-შურდული სულ გარე-გარე კი აქვთ მიმიზნული, და, ზღაპრების მოსმენა რომ აღარ უნდოდათ?..

მაშინ, მეც არაფერი მაქვს თქვენთვის მოსაყოლი, ჩემო პატარებო, ჰოდა, მორჩა ბექნა ბიჭის ზღაპარიც, ფა-ფუ...